

摘藻堂四庫全書薈要

經部

欽定四庫全書薈要

經部

欽定周官義疏卷四十

詳校官編修臣程嘉謨



欽定四庫全書舊要卷二千四百三

經部

欽定周官義疏卷四十

考工記



正義鄭氏康成曰司空掌邦事篇亡漢興購求千金不得此前世識其事者記錄以備大數爾

案河間獻

王得此記其後以附五官

賈氏公彥曰考工記雖不知作於

何時要在秦以前是以遭秦滅籍韋氏裘氏等闕也首末相承總有七段從國有六職至謂之婦

工言百工事重在六職之內也從粵無鑄至夫人而能為弓車言四國皆能其事不須置國工也從知者創物至此皆聖人所作言聖人創物之意也從天有時至此天時也言材雖美工又巧不得天時地氣則不良也從攻木之工至陶旋言工之多少之數及工別所宜也從有虞氏至周人上輿論四代所尚不同之事也從一器而工聚者車爲多專據周家所尚之事也 林氏希逸曰此記原無冬

官二字乃漢人所增匠人竝舉世室重屋明堂則所記不獨周制但不全耳

案冬官名司空者四時之有冬積於虛空不用之地而度地居民立城邑治溝洫川梁於農事既畢爲宜司空者蓋主於空虛不用之時而使民有興事任力之實用也冬日之閉凍也不固則春夏之長草木也不茂此天道之以虛爲實也事典不立則三時之利不能盡四民之業無所基此聖人之

以虛爲實也故官以司空名而其職則曰以富邦  
國以養萬民以生百物 司空之職居四民時地  
利工事其末耳今其大經大法無一存者蓋諸侯  
惡其害已而皆去其籍惟百工造作之法自古相  
沿意者故府亦有其籍以其爲民生所習用工師  
所世守故猶可傳述然觀匠人營國爲溝洫僅具  
高濶廣袤之度而所以建立城邑分處四民因山  
川形勢以辨井牧別疆潦規偃潴町原防者無一

及焉則工事中有關於大經大法者亦不存矣蓋  
記者僅得之工師之傳述而未見故府之典籍故  
也 記言秦鄭是東周語淮北濟汶皆齊魯閒地  
終古戚連裊莢注以爲齊語其周末齊魯閒曉工  
事而工文辭者爲之與

國有六職百工與居一焉

與音預

正義鄭氏康成曰百工司空事官之屬司空掌營城  
郭建都邑立社稷宗廟造宮室車服器械監百工者

唐虞已上曰共工

賈疏史記楚世家共工作亂帝使重黎誅之又舜典帝曰疇若予工

僉曰垂哉帝曰兪咨垂汝共工

賈氏公彥曰六職即下或坐而論

道至治絲麻以成之是也

案王公所任天職也與士大夫共之農工商亦謂之職者各有所守之業以服事其上一失其職則生養不遂而教治以傾矣女史掌王后之禮職內命婦亦皆有職而況外命婦及農工商賈之婦女乎先王之世貴賤男女無一人而無職禮樂政刑無非所以警

其職者故自上以下莫敢淫心舍力此正德利用厚生之根本也大宰九職不出農工商三者虞衡所掌即守山澤之農園圃藪牧農之類也閒民則農民之不受田者臣妾則士大夫之家衆也司徒所增職事三學藝者士也世事者賤技末藝世善其事服事者不能爲農工商而給役於官其無職者則罰及焉不勤其職則謂之罷民而刑施焉後世四民之外益以二氏雜以倡優而民多失職論者所以欲塞其流而

明先王之道以道之也

或坐而論道或作而行之或審曲面執以飭五材以辨  
民器或通四方之珍異以資之或飭力以長地材或治  
絲麻以成之

執音勢飭音勅辨皮莧反長知文反下同注故書資作齊杜子春云當爲資

正義鄭氏康成曰言人德能事業之不同者也論道  
謂謀慮治國之政令也作起也辨猶具也資取也操  
也此五材金玉皮木土 鄭氏衆曰審曲面執審察  
五材曲直方面形執之宜以治之及陰陽之面背是

也春秋傳曰天生五材民竝用之 陳氏傳良曰論

之者在上行之者在下未有論之不當而行之不悖

者也 易氏祓曰古者珪璧金璋錦文珠玉不粥於

市又司市害者使無靡者使微禁唯恐不嚴此乃通

四方之珍異以資之蓋所謂珍異非必金玉錦文之

物也但地之所無而人以爲貴者則謂之珍地所罕

見而人以爲不常者則謂之異以切於民用故通之

也 賈氏公彥曰飭勤也地財穀物皆是 林氏希

逸曰田畊最爭人力人力所及田無高下 陳氏祥  
道曰三農生九穀園圃毓草木虞衡作山澤之材皆  
所謂長地財也

案周官所云珍異多指食物此記所指則玉石丹漆  
金錫之類耳蓋民生日用必需之物隨地而有之商  
賈所通不過四方之珍異且錦文珠玉用之各有差  
等是以民勤於本業惟土物是愛商賈無奇贏而逐  
末者少乃經國之大猷也後世無物不轉販半無益

於民用而滋其淫侈土利之所以不博民生之所以  
不厚風俗之所以衰敝恆必由之資借也濟也借懋  
遷以濟民用之不足也

存疑鄭氏衆曰五材金木水火土也 鄭氏鏐曰鄭

康成謂五材金玉皮木土蓋據考工記所用之材以  
爲言賈疏水火單用不得爲器物故不以備五材之  
目以下文考之凡器非水火無自而成輪人斬轂以  
火養其陰水之以眡其輪之平沈之均弓人爲弓橋

幹橋角欲熟於火鬻膠則欲水火相得是水火亦得爲材也

坐而論道謂之王公作而行之謂之士大夫審曲面勢以飭五材以辨民器謂之百工通四方之珍異以資之謂之商旅飭力以長地財謂之農夫治絲麻以成之謂之婦功

正義鄭氏康成曰王公天子諸侯也士大夫受職居官者五材各有工言百衆言之也商旅販賣之客也

易曰至日商旅不行農夫三農受夫田也婦功布帛  
婦官之事

案春秋五等之君葬皆稱公儀禮有公食大夫禮一  
國之政決於君故注以公爲諸侯其不言三公以三  
公論道經邦舉王則與三公坐論在其中矣

粵無鑄燕無函秦無廬胡無弓車

粵越同鑄音博函  
戶南反廬魯吳反

正義鄭氏康成曰此四國者不置是工也鑄田器詩  
云猗乃錢鑄又云其鑄斯趙函鎧也孟子曰函人唯

恐傷人廬讀爲廬謂矛戟柄竹攢秘

賈疏漢世以竹爲之攢謂柄之

入登處秘即柄也

胡今匈奴

粵之無鏹也非無鏹也夫人而能爲鏹也燕之無函也非無函也夫人而能爲函也秦之無廬也非無廬也夫人而能爲廬也胡之無弓車也非無弓車也夫人而能爲弓車也

夫注如字沈音扶

正義鄭氏康成曰言人人皆能作是器不須置國工粵地塗泥多草薺而山出金錫鑄冶之業田器尤多

燕近強胡習作甲冑秦多細木善作矜秘

賈疏矜即前注所謂

攢

匈奴無屋宅田獵畜牧逐水草而居皆知爲弓車

案不置是工疑未必然特言其器皆精良無以技名者耳

知者創物巧者述之守之世謂之工

知音

正義鄭氏康成曰創物謂始闢端造器物若世本作

者是也

賈疏世本無句作磬儀狄造酒之類

守之世謂父子世以相教

賈氏公彥曰此知者即下文聖人

案必知周萬物而後能創伏羲神農黃帝堯舜是也  
巧者官司之長如工垂及斯伯與之類能知聖人之  
意循而達之以究盡制作之理工則世守其成法而  
已輪人記所云巧者和之則工之巧者耳

百工之事皆聖人之作也

正義鄭氏康成曰事無非聖人之所爲也

賈疏據世本作篇多

非聖人親爲要君統  
臣功皆聖人統攝之

王氏昭禹曰易言備物致用

立成器以爲天下利莫大乎聖人蓋百工之事雖形

於度數之粗而天下之至理寓焉一方一圓而具天地之象一奇一偶而具陰陽之數或曲或直而有剛柔之理或厚或薄而有盈虧之義豈淺識者所能及哉

案易大傳網罟耒耜衣裳舟車門柝杵臼弧矢棺槨宮室書契之作或出於上古之聖人或出於中古及後世之聖人

爍金以爲刀凝土以爲器作車以行陸作舟以行水此

皆聖人之所作也

爍始灼反注故書舟作周鄭司農云當爲舟

正義趙氏溥曰爍謂鎔鑄鄭氏康成曰凝堅也

王氏昭禹曰以金爲體者以火爲用故於金言爍以土爲體者以水爲用故於土言凝

天有時地有氣材有美工有巧合此四者然後可以爲良

正義鄭氏康成曰時寒溫也氣剛柔也良善也賈

氏公彥曰時若弓人春液角夏治筋秋合三材冬定

# 體之屬

材美工巧然而不良則不時不得地氣也

正義鄭氏康成曰不時不得天時 劉氏彝曰不言

不得天時者器有遷乎其地而不能爲良以於地氣  
有不得也若天時則大畧相同而爲之不以其時人  
之過耳

橘踰淮而北爲枳鸛鵒不踰濟貉踰汶則死此地氣然

也 枳諸氏反鸛其俱反鵒音欲  
濟子禮反貉戶各反汶音問

正義毛氏應龍曰晏子云江南爲橘江北爲枳 林  
氏希逸曰枳橘只是一種移橘於淮北則變而爲枳  
鄭氏康成曰鸛鵒鳥也春秋昭公二十五年有鸛  
鵒來巢傳曰書所無也汶水在魯北 郝氏敬曰鸛  
鵒產南方濟齊魯間水名踰濟自南而北也貉狐屬  
產北方汶水入於濟踰汶自北而南也

鄭之刀宋之斤魯之削吳粵之劒遷乎其地而弗能爲

良地氣然也

削思約反  
又思詔反

正義鄭氏康成曰去此地而作之則不能使良也

燕之角荆之幹妨胡之筈吳粵之金錫此材之美者也

幹古旱反妨扶云反筈古老反注故書

筈爲筈杜子春云當爲筈筈讀爲橐

正義鄭氏康成曰荆荊州也幹柘也可以爲弓弩之  
幹妨胡胡子之國在楚旁筈矢幹也禹貢荊州貢櫟  
幹栝柏及筈簠櫜 郝氏敬曰角牛角可爲弓材燕  
地寒角堅實

天有時以生有時以殺草木有時以生有時以死石有

時以泐水有時以凝有時以澤此天時也

泐音勒澤音釋又音亦

正義鄭氏康成曰言百工之事當審其時也 鄭氏

衆曰泐謂石解散也夏時盛暑大熱則然

凡攻木之工七攻金之工六攻皮之工五設色之工五

刮摩之工五搏埴之工二

刮古八反搏音團埴時職反注故書七爲十刮作掬鄭司

農云十當爲七掬讀爲刮

正義鄭氏康成曰攻猶治也搏之言拍也埴黏土也

賈疏以手拍黏土以爲埴乃燒之

鄭氏鍔曰設色者敷布其采色

也刮摩刮去而摩鑢也先鄭以刮摩爲玉工義未該  
雕人栒人矢人不得謂之玉工也

攻木之工輪輿弓廬匠車梓攻金之工築冶鳧栗段桃  
攻皮之工函鮑鞞韋裘設色之工畫績鍾筐幌刮摩之

工玉栒雕矢磬搏埴之工陶旒

栗古栗字段丁亂反鞞音運績戶對反幌莫黃

反栒側筆反旒甫罔反注故書雕或爲舟埴或爲植杜子春云舟非也

正義鄭氏康成曰廬矛戟矜秘也國語曰侏儒扶廬

梓榎屬也

鄭氏衆曰鮑或爲鞞蒼頡篇有鞞

賈疏

藝文志蒼頡七章李斯作籀覺篇有治皮之事故引以爲證案覺如充反或音儁柔韋也治皮革者以瓦爲竈而反覆熏揉之

存疑鄭氏康成曰事官之屬六十此識其五材三十工畧記其事耳其曰某人者以其事名官也

賈疏若匠人梓

人韞人鮑人之類

其曰某氏者官有世功若族有世業以氏

名官者也

賈疏官有世功若韋氏裘氏冶氏之類以官爲氏族有世業若鳧氏臬氏之類以氏

名官

辨正賈氏公彥曰三十工於六十爲不備記人錄者

未必在六十屬之內直以數言之充得三十工而已  
案諸工當各有官統之未可以工即爲官也黏定事  
官注說殊滯

有虞氏上陶夏后氏上匠殷人上梓周人上輿故一器  
而工聚焉者車爲多

正義鄭氏康成曰官各有所尊王者相變也舜至質  
貴陶器甗大瓦棺是也

賈疏士喪禮兩甗醴酒明堂  
位泰有虞氏之尊檀弓有虞

氏瓦  
棺

禹治洪水民降邱宅土卑宮室盡力乎溝洫而

尊匠湯放桀疾禮樂之壞而尊梓

賈疏梓人所以造禮樂之器

武

王誅紂疾上下失其服飾而尊輿

鄭氏鍔曰商人

變虞夏之質而用木器以昭禮樂之文周人用殷輅之堅而異物采以辨尊卑之等 賈氏公彥曰車一

器也而輪人輿人車人輶人聚焉以周所尚故也

案陳氏傳良輶萃車制名目頗便學者但舛誤甚多

恐滋疑眩畧爲改正

夾車兩旁而圓轉者曰輪輪

之外輶而行地者曰牙

亦曰車輶關西曰輶

牙之中直指湊轂

者曰輻

亦曰輪轆

輻之所湊而貫軸利轉者曰轂

亦謂之軹見詩

轂內之大穿曰賢轂末之小穿曰軹

轂中鐵關西曰軹轆轂端皆也

轂中空壺處容軸者曰數轂外以皮約束之而畫以

五采曰篆以革鞅轂曰幬輻之近轂稍麤處曰股輻

之近牙稍細處曰骹輻樨之入轂鑿者曰菑

亦曰弱

輻

樨之入牙者曰蚤轂與牙之受菑蚤者曰鑿鑿有楸

以固之曰檠輪牙稍偏於外而輻股向內隆起者曰

綆

漢時人曰輪第已上輪人

車身受載者曰輿輿之深曰隧輿

後橫木曰軫

六分車廣以一爲之軾圖

全輿之底通曰軾

軾方象地又云

加軾與轆四尺又云弓長四尺謂之庇軾

亦謂之收見詩車兩旁爲闌者曰輶

亦謂之輶輶之植者橫者曰軾

與轂末同名

兩輶上出式人立

可用一手馮之者曰較

九辨倚結軾今軾即此

自較以前揉曲

以周於當面人可俛馮之以爲敬者曰式

式低較高如兩層較

然故曰重較亦曰重耳若牛車及後世之車無高低兩層謂之平較亦曰平扁

式之下植者

橫者曰輶

已上輿人

車轅曰輶

前曲如梁詩謂之梁輶

輶之前持衡

者曰頸

又輶前胡曲中疾見大行人

輶之後承軾者曰踵輶之當

伏兔者曰當兔輿下三面材持車正者曰任正

左右并前

三軌爲

任正之當前一面曰軌

軌前十尺亦作軌

任正三面亦

通曰軌

鄭注軌謂輿下三面之材

輈之前頸所持而下屬兩軌以

駕服馬者曰衡兩軌之間曰衡任兩端貫於轂中橫

輿下爲伏兔所鉗而承輿者曰軸

軸末以鐵止輪之外軼者曰輦見詩

上連輿底下鉗軸爲駕說之用者曰輶一曰伏兔

亦謂

之輶見易已上輈人

車有六等之數

正義鄭氏康成曰此謂兵車也車有天地之象人在其中焉六等之數法易之三材六畫

車軫四尺謂之一等

正義鄭氏康成曰軫輿後橫木

賈疏即今之車枕

楊氏恪

曰車軫四尺注以爲輿後橫木下記言加軫與轡焉四尺注以爲軫輿也蓋軫本後橫木之名而通輿下四面皆可謂之軫其形則方故曰軫方象地輿下四面雖皆曰軫而論軫之高則以後橫木爲度軫圍一

尺一寸方徑二寸四分寸之三輪六尺六寸故軹高三尺三寸并軫與轡七寸共高四尺

戈秘六尺有六寸既建而迤崇於軫四尺謂之二等

秘兵

楮反有音又下凡言尺寸者竝同迤以氏反崇本亦作古富字

正義鄭氏康成曰戈父戟矛皆插車軻

賈疏當皆以鐵圍範邪置

於軻之上下乃插而建之

崇高也鄭司農云迤謂著戈於車邪倚

也趙氏溥曰戈謂刃秘謂柄戈秘雖長六尺六寸

然邪倚則有折除之數故只高四尺

案戈短兵可迤而建之其餘長兵則建而不迤故下  
皆直言崇之數而無迤之分也五兵何以皆建古者  
兵車容三人中御左挾弓矢右雖主擊刺亦時下推  
車持輪不常持兵且車戰相持惟利弓矢必輅而相  
及車轂錯然後短兵接焉故建於車之右方隨其所  
宜取而用之爲便耳 左傳楚人教晉人脫扃杜注  
扃車上兵闌兵闌可脫當在轎之外賈疏所云以鐵  
圍範者是也其建之則短者在前長者在後與

人長八尺崇於戈四尺謂之三等

正義林氏希逸曰人長八尺立於車上是又崇於戈者四尺

父長尋有四尺崇於人四尺謂之四等

正義鄭氏康成曰八尺曰尋父長丈二

車戟常崇於父四尺謂之五等

正義鄭氏康成曰倍尋曰常

存疑趙氏溥曰言車戟者以其長不必皆倍尋惟建

於車者必然

酋矛常有四尺崇於戟四尺謂之六等

酋在由反

正義鄭氏衆曰酋發聲直謂矛

案酋矛夷矛皆刺兵非句兵也後人因詩二矛重喬意其爲句不知喬所以縣英鄭箋謂矛矜室題是也非以喬爲句古曰矛後世曰稍又曰槩今則爲槍不言夷矛以并軫高爲六等已備也廬人備載夷矛之度而曰六建既備車不反覆鄭風魯頌皆言二矛

則夷矛亦建矣

車謂之六等之數

正義鄭氏康成曰申言數也

案上文曰車有六等之數嫌車之制有六等故申明之見後五等雖非車之數而人在車中戈矛戟矛建於車上故并謂之車之等數也

凡察車之道必自載於地者始也是故察車自輪始正義鄭氏康成曰先視輪也自從也 鄭氏鍔曰漢

志曰古之聖人觀轉蓬始知爲輪輪行可載因物智  
生復爲之與輿輪相乘流轉罔極則車以輪爲重可  
知矣

凡察車之道欲其樸屬而微至不樸屬無以爲完久也  
不微至無以爲戚速也

屬章欲反  
戚音促

正義鄭氏康成曰樸屬猶附著堅固貌也齊人有名  
疾爲戚者春秋傳曰蓋以操之爲已蹙矣

賈疏莊三  
十年公羊

傳速疾也書或作數

鄭氏衆曰微至謂輪至地者

少言其圜甚著地者微耳著地者微則易轉也故不  
微至無以爲戚數 鄭氏鍔曰輪合三材而爲之故  
欲其附著堅固

輪已崇則人不能登也輪已庳則於馬終古登阨也

音庳

婢又音卑阨大

爾反劉堂何反

正義鄭氏康成曰已大也甚也齊人之言終古猶言  
常也阨阨也輪庳則難引 賈氏公彥曰輪已崇則  
過六尺六寸軫即過四尺爲太高故人不能登輪已

庫則不及六尺六寸而軫不及四尺爲太下則馬難引常似上阪

故兵車之輪六尺有六寸田車之輪六尺有三寸乘車之輪六尺有六寸

乘繩證反

正義鄭氏康成曰此以馬大小爲節也

賈疏以馬大小爲節者馬

高則車亦高馬下則車亦下

兵車革路也田車木路也乘車玉路

金路象路也兵車乘車駕國馬

賈疏云國馬者據軛人職國馬之軛而言

校人所云種馬戎馬齊馬道馬四者是也

田車駕田馬

賈氏公彥曰先

言兵車重戎事也田獵戰伐相類即言田車以繼兵車後別言乘車之等也李氏嘉會曰田車輪低便於逐獸

六尺有六寸之輪軹崇三尺有三寸也加軫與轡焉四

尺也人長八尺登下以爲節

軹音只轡音卜又音僕

正義鄭氏康成曰此車之高者也軹轂末也軫輿也

鄭司農云軹車也

賈疏物有二名

軹謂伏兔也

賈疏今謂之車展

某

謂此軹與轡并七寸田車又宜減焉

賈疏車軸上有伏兔伏兔尾後

上載車軫軫上始有車輿軸去地三尺三寸上兼伏  
免及軫并七寸則車輿去地總四尺也田車軾崇三  
尺一寸半減乘車寸半加軾與乘車之軌廣取數於  
軾亦減乘車寸半爲五寸半也

此軌廣八尺旁出輿亦七寸也

賈疏軌謂轍轍廣八尺車輿六尺有六寸

則軌旁出輿兩相各七寸七寸之數取於軾軾七寸之數

賈氏公彥曰此經論

軾崇四尺不高不下之節兵車乘車輪高六尺六寸

軾是軸頭處輪之中央故崇三尺有三寸加軾與軾

二者七寸則得四尺 孔氏穎達曰說文云軾輪小

穿也軾車軸端也先鄭謂軾軾也

軾專同

康成謂轂末

也然則轂末軸端共在一處而有軹轆二名 薛氏  
季宣曰軹亦謂之轆又謂之軌少儀曰祭左右軌鄭  
氏謂軌軹同是轆頭也

案車軫之說前楊氏恪已詳此軫方徑二寸七分有  
半當車後登降之處自軸心至軾面總高七寸

軸之半徑

即軹之半徑 轂入輿下左右任正木在轂上須稍高以容

轂轉故軸上必有轆度之轆之圍徑無文軾人當免  
之圍居軾長十之一方徑三寸六分軾亦在輿下度

輿者則免圍與當免等大可知經不言者因輈以見

也軸半徑二寸二分加輈方徑三寸六分共高五寸

八分除輈半徑五寸一分弱

此用密率計算圍三不能徑一輈圍三尺二寸

實徑一尺二分弱

中間距任正木七分強可以容轉以五寸

八分加後軫出輈上者一寸二分總高七寸也

輿板之厚

上與軫平亦以一寸二分爲率後軾在輿下者餘一吋五分有半輈踵免尾爲缺曲以承之

輈左

右各一設之蓋在任正木內八寸許以輈入輿下者

七寸必稍離使不礙輈轉也輈當連於輿有兩木鉗

於軸爲駕說之活法康成謂伏兔至軌蓋如式深在軸前者尺四寸又大半寸尾後上載車軫處亦當如輶之踵圍以當兔之圍例之可見

輪人爲輪斬三材必以其時

正義鄭氏康成曰三材所以爲轂輻牙也斬之以時材在陽則中冬斬之在陰則中夏斬之今世轂用雜榆輻以檀牙以櫟也

三材既具巧者和之

正義鄭氏康成曰調其鑿內而合之

賈疏鑿內謂孔入轂入牙者竝

須調使得所也

案注言內即柄謂輻樛之入

轂入牙者齒蚤是也鑿謂轂與牙之受齒蚤者

通論鄭氏鍔曰惟輪人爲輪弓人爲弓皆曰巧者和

之者蓋輪合三材弓合六材惟材之合者多故貴乎

工之巧

轂也者以爲利轉也輻也者以爲直指也牙也者以爲

固抱也

牙五嫁反又午加反

正義郝氏敬曰輪之中虛容軸者曰轂輪內周廻直

木三十曰輻外行地而周迴抱輻者曰牙 鄭氏康

成曰利轉者轂以無有爲用也

賈疏老子三十輻共一轂當其無有車之

用注無有謂空虛轂中空虛輪得行

賈氏公彥曰輻以爲直指者入

轂入牙竝須直指不邪曲也 鄭氏衆曰牙謂輪輳

也世或謂之罔書或作輳 王氏昭禹曰轂中虛而

有容故有取於利轉輻實輪而湊轂故有取於直指  
牙周環轂輻以運行故有取於固抱

輪敝三材不失職謂之完

正義鄭氏康成曰敝盡而轂輻牙不動 賈氏公彥  
曰謂之職者轂輻牙各自職任自相支持

案用之敝而見其完乃知材美工巧故築氏為削亦  
曰敝盡而無惡

望而眡其輪欲其悞爾而下也進而眡之欲其微至  
也無所取之取諸圜也

悞迷錫反圜于權反注鄭司農  
云微至書或作危至故書圜或

作  
員

正義鄭氏康成曰輪謂牙也悞均致貌微至至地者

少也非有他也。圖使之然也。顏氏曰：望而眡之遠而眡之也；進而眡之近而眡之也。

案望遠視進迫近曰望而視者稍遠而視之已得其大畧進而眡之則迫近而可以得其精微也。慎爾言其週遭之度皆同下地言其近地之處漸殺。上言合三材以爲輪則轂爲先輻次之牙次之此則輪成而視其善否。初視輪次視輻次視轂物之理言之序也。

望其輻欲其掣爾而纖也進而眊之欲其肉稱也無所

取之取諸易直也

掣音蕭又音朔稱尺證反易以政反

正義鄭氏康成曰掣纖殺小貌也

賈疏凡輻皆向轂處大向牙處小言

掣纖據向牙處小而言也

肉稱弘殺好也

賈疏向轂為弘故為弘殺案弘似謂股殺似

謂散好言各得其分而相稱

王氏昭禹曰易則無挫損直則無

撓曲

望其轂欲其眼也進而眊之欲其幬之廉也無所取之

取諸急也

眼魚懇反幬音蹈又音濤又音疇

正義鄭氏康成曰眼出大貌幬幔轂之革也革急則裏木廉隅見 王氏昭禹曰幬之廉即下文所謂幬必負幹也

眡其綆欲其蚤之正也察其菑蚤不齟則輪雖敝不匡

綆音餅又歌冷反蚤音爪菑側吏反齟五構反一音隅

正義鄭氏衆曰綆謂輪筭也匡枉也 鄭氏康成曰

蚤當爲爪謂輻入牙中者也輪雖筭爪牙必正也菑謂輻入轂中者也菑與爪不相侔乃後輪敝盡不匡

刺也 賈氏公彥曰凡造車輪皆向外筭向外筭則

車不掉爪入牙中鑿孔必正直不隨邪也凡植物於地謂之蕃輻入轂中似植物地中亦謂之蕃人齒參差謂之齟此三十輻之蕃入轂與蚤入牙一一相當不相侔戾是不齟也如此輪雖敝盡不匡刺

案綆字之義注疏得之牙之鑿與轂之鑿正相值牙若不稍偏向外則重勢兩平輪可掉向外亦可掉向內故令牙向外筭三分寸之二不正與輻股相當則

重勢稍偏而輪不掉矣。算者何也？飯甑內以篋作底，四周下而中央隆起，謂之甑算。輪牙稍偏於外而輻股向內隆起，亦若甑算然。然則圓物之中隆而四周下者，皆可以算名之。故漢時有輪算之語耳。牙向外而蚤仍正者，牙之鑿未嘗偏，但輻入牙之杓不用正，而用偏缺邊向內，則牙自向外矣。林希逸不得其解，繆謂輪外有一重護牙者，於是或從算字生義，則以爲竹或從綆字生義，則以爲繩。愈說愈迷，皆由不詳。

考注疏之故也

凡斬轂之道必矩其陰陽

正義鄭氏康成曰矩謂刻識之也故書矩爲距鄭司  
農云當作矩謂規矩也 賈氏公彥曰欲斬轂之時  
先就樹刻之記其向日爲陽背日爲陰之處爲後以  
火養其陰故也

案木之體圓中分其陰陽而以矩畫而識之

陽也者稹理而堅陰也者疏理而柔是故以火養其陰

而齊諸其陽則轂雖敝不斂

稹之忍反一音真斂  
黑各反又呼報反

正義鄭氏康成曰稹致也火養其陰炙堅之也斂斂

暴陰柔後必橈減疇革暴起 賈氏公彥曰若不以

火養炙陰柔之處使堅與陽齊等後以革鞣則陰柔

處瘦減革不著木必有暴起以火養之雖敝盡不斂

暴也

轂小而長則柞大而短則摯

柞莊百反  
摯魚列反

正義鄭氏衆曰柞讀爲迫喑之喑謂輻間柞狹也摯

讀爲桱謂輻危桱也

案危桱之訓是也輻字疑訛車人記長轂則安桱者安之反轂

大而短則車易於左右傾側桱杙而不安矣

鄭氏康成曰小而長則蕃

中弱大而短則轂末不堅

賈疏小而長則輻間柞狹故蕃中弱大而短即轂末

淺短故不得堅牢案轂末淺短則容軸者少而不得安固堅即安固之意

是故六分其輪崇以其一爲之牙圍

正義鄭氏康成曰六尺六寸之輪牙圍尺一寸 賈

氏公彥曰此據兵車乘車言若田車輪小其數亦可

推而知

存疑易氏被曰以兩面牙圍一尺寸言之每面得五寸半

案牙有四面依下注牙厚一寸三分寸之二計之則上下兩面各一寸三分寸之二內外兩面各三寸六分寸之五合之得一尺一寸易氏被但以兩面言之於圍字義解不明

參分其牙圍而漆其二

正義鄭氏康成曰不漆其踐地者也漆者七寸三分

寸之一不漆者三寸三分寸之二令牙厚一寸三分

寸之二則内外面不漆者各一寸也賈疏牙厚一寸三分寸之二餘

二寸分於外内面故各一寸也案注言令者行澤

欲行山欲俾牙之廣狹不同故言令也雖廣狹不

同而牙圍尺

一寸則無異

榑其漆内而中誣之以爲之轂長以其長爲之圍誣邱勿反

正義鄭氏衆曰榑者度兩漆之内相距之尺寸也

鄭氏康成曰六尺六寸之輪漆内六尺四寸是爲轂

長三尺二寸圍徑一尺三分寸之二也賈疏不漆者外内面各一

寸則兩畔減二寸故漆內有六尺四寸也中屈此六尺四寸故轂長三尺二寸也又以三尺二寸爲圓圓三徑一故徑一尺三分寸之二也案圓徑之實數徑一不止圓三圓三不能徑一祖沖之約率徑七圓二十二者近之此注疏皆以圓三徑一釋之實未密也學者知之

案史記平津書更鑄五銖錢周郭其下令不可磨取鉛蓋古語以週遭爲郭而郭桴義竝同

以其圍之防捎其數

防音勒捎音蕭數素口反

正義鄭氏康成曰捎除也防三分之一也鄭司農云數讀爲蜂數之數謂轂空壺中也某謂此數徑三寸

九分寸之五壺中當輻菑者也

案此謂壺中外當輻菑之處非指輻菑所

入之孔也

蜂數者猶言趨也數者衆輻之所趨也

賈氏

公彥曰車轂之法其孔必大頭寬小頭窄當輻入處謂之數寬窄得中而已下文賢是大頭穿內徑四寸五分之二此當輻菑處徑三寸九分寸之五

案以其圍之防捎其數謂以三分之二爲肉三分之一爲壺中空也壺中空所以受軸者下文言五分其轂之長去二以爲賢去三以爲軹則壺中內大而外

小惟外當輻菑處其內正得三分之一也統而言之  
中空處皆可名數下經量其數以黍是也切而指之  
外當輻菑處爲數此經是也

五分其轂之長去一以爲賢去三以爲軹

去起呂反一  
依注作二

正義鄭氏衆曰賢大穿也軹小穿也 鄭氏康成曰

此大穿徑八寸十五分寸之八小穿徑四寸十五分  
寸之四大穿甚大似誤矣大穿實五分轂長去二也  
去二則得六寸五分寸之二凡大小穿皆謂金也今

大小穿金厚一寸則大穿穿內徑四寸五分寸之二  
小穿穿內徑二寸十五分寸之四如是乃與數相稱  
也賈疏以其大穿與數中及小穿三者須相類故鄭以五分寸去二爲允也  
案輶人云五分寸其軫間以其一爲之軸圍軸圍一尺三寸五分寸之一當徑四寸五分寸之二加金厚一寸得六寸五分寸之二大小適相合  
賈氏公彥曰上經言轂空壺中此經言轂之大小兩頭也

案外穿小於內穿者內穿大然後軸體厚壯而承輿力強外穿小然後轂體堅實而無破裂之患大穿在

壺中之內小穿在壺中之外則二在外一在內以置其輻者正壺中當輻蓄之處也

容轂必直陳篆必正施膠必厚施筋必數幬必負幹篆直

轉反數  
色角反

正義鄭氏康成曰容者治轂爲之形容也篆轂約也

幬負幹者革轂相應無羸不足

賈疏幬覆也謂以革覆轂轂之木隱著革

使之急是革轂相應轂不耗瘦則革無羸轂亦無不足也

郝氏敬曰輻所輳處

防損折施膠爲黏必厚施筋爲束必密包之以革必

貼木數密也負幹皮負木也卽上節云廉急也

案篆者以革約轂采芑詩言約軹孔疏引此以解之  
巾車職夏篆注云五采畫轂約也必正者言施革不  
邪迤則約之固也轂體直而短除輻鑿三寸五分不  
約則其餘內外皆約之矣以次第言當施膠施筋更  
施膠而後以革約之先言陳篆者革在外指其可見  
者而後及其內也既云膠厚筋數而又云幬必負幹  
者見筋膠雖多而通體均勻所以幬革緊傳於轂而

不失其容之直篆之正也

既摩革色青白謂之轂之善

正義鄭氏康成曰謂丸漆之乾而以石摩平之革色

青白善之徵也

賈疏謂以革鞣轂訖將漆之先以骨丸之待乾乃以石摩平之其色青白

則善也

案骨丸之法未詳角人注有骨入漆浣之

語巾車注有軟讀爲漆浣之漆之語說文浣字注云漆和灰而髹浣浣與丸蓋一音之通轉然則以骨丸之蓋以骨灰和漆先塗之乃再漆之也既摩而革色青白其即顯此骨灰之色與

參分其轂長二在外一在內以置其輻

正義鄭氏康成曰轂長三尺二寸者令輻廣三寸半

則輻內九寸半輻外一尺九寸

賈疏知輻廣三寸半者上云以圍之防稍

其藪轂徑一尺三分寸之二取三之一作藪徑三寸九分寸之五兩畔得二分有七寸九分寸之一一畔得三寸九分寸之五下云量其鑿深以爲輻廣深三寸半故輻廣三寸半也

賈氏公彥

曰此論置輻於轂相去外內遠近之法

凡輻量其鑿深以爲輻廣

量音良

正義鄭氏康成曰廣深相應則固足相任也

賈疏如上所計

則輻之廣深各有三寸半是相應也若轂小而長大而短則不相應非作即槩也

案不言輻之厚者轂圍三尺二寸以三十輻均之輻股當厚一寸有奇其弱之入鑿者以漸而殺焉骹之向牙者亦殺也

輻廣而鑿淺則是以大抗雖有良工莫之能固鑿深而輻小則是固有餘而彊不足也

杭五骨反

正義鄭氏康成曰抗搖動貌彊不足言輻弱不勝轂之所任也 賈氏公彥曰此論轂與輻不得所之病

林氏希逸曰輻廣而鑿淺則柎入不深是以易搖

抗而不固鑿深而輻小則其幹弱是以雖固而不強也

案凡杓之廣狹未有不與鑿相得者而輻之廣狹亦必與鑿之淺深相稱鑿有淺深以轂之圍有大小也圍小鑿淺而輻廣則鑿之銜輻不固圍大鑿深而輻小則輻之支轂不強

故竝其輻廣以爲之弱則雖有重任轂不折

竝獲耕反

正義鄭氏衆曰竝謂度之鄭氏康成曰言力相稱

也弱菑也今人謂蒲本在水中者爲弱是其類也

案輻

直指輻以爲彊故以菑之沒於鑿中者曰弱深廣相稱周輶三十鑿肉好均停故雖重而輶無破折之患

趙氏溥曰度其輻之廣狹以爲菑之大小長短則菑與輻其力相稱雖任重載輶亦不毀

參分其輻之長而殺其一則雖有深泥亦弗之謙也

殺色

界反謙注作

黏女廉反

正義鄭氏康成曰殺衰小之也鄭司農云謙讀爲黏謂泥不黏著輻也賈氏公彥曰假令輻除入輶之

中其外長三尺則殺一尺以向牙

案外長三尺假設言之輪半徑三尺

三寸除轂半徑與牙之博牙轂間有二尺三寸有奇其殺約八寸也

唯以本麤末細塗

則向下利故泥不黏著之也

參分其股圍去一以爲骹圍

骹下教反又苦教反

正義鄭氏康成曰謂殺輻之數也鄭司農云股謂近

轂者也骹謂近牙者也方言股以喻其豐故言骹以

喻其細人脰近足者細於股謂之骹羊脰細者亦謂

骹賈氏公彥曰上言殺其一者據長短之中殺一

分此言三分殺一據本粗末細而言假令輻近轂處圍六寸其近牙處則圍四寸也

揉輻必齊平沈必均

揉如九反  
又音柔

正義鄭氏康成曰揉謂以火槁之衆輻之直齊如一也平沈平漸也鄭氏衆曰平沈謂浮之水上無輕重

直以指牙牙得則無槩而固不得則有槩必足見也

魚槩

列反注音涅乃  
結反見賢遍反

正義鄭氏康成曰得謂倨句鑿內相應也

賈疏輻直爲倨牙曲

爲句鑿內必正正則爲得

鄭司農云槲櫟也蜀人言櫟曰槲某謂

必足見言槲大也然則雖得猶有槲但小耳

賈疏鄭非直以

文勢反之知有槲以意量之輻入牙中無有不用槲而固者也

案直以指牙謂蚤入牙之鑿與齒入轂之鑿必正相

對也但欲輻之指牙者直而又欲牙之少偏向外則

入牙之杓必內邊缺三分寸之二以爲倨句

杓之長者爲倨

以縱言之短者爲句以橫言之

凡鑿杓無不相應而倨句則唯此爲

然故記特言牙得也疏以輻直爲倨牙曲爲句蓋未  
曉此理故於下節繆謂牙孔向外侵耳 無槩而固  
甚言其固耳後人紛紛以爲果無槩失之矣

六尺有六寸之輪綆參分寸之二謂之輪之固

正義鄭氏康成曰輪算則車行不掉也參分寸之二

者出於輻股鑿之數也

賈疏鑿牙之時孔向外侵三分寸之二使輻股外算故云

輻股鑿之數也

案上經云眡其綆欲其蚤之正則牙孔不偏可知牙

孔不偏而輻蚤缺三分寸之二缺邊向內是以蚤雖正而牙已偏向外輻股隆起而筭矣疏謂鑿牙時孔向外侵三分寸之二似無庸然固者安固不搖注云不掉是也冠以六尺有六寸之輪者大車之輪九尺綆一寸若田車之輪六尺三寸則綆又微斂可知凡爲輪行澤者欲杼行山者欲侔

杼直呂反

正義鄭氏康成曰杼謂削薄其踐地者侔上下等

杼以行澤則是刀以割塗也是故塗不附侔以行山則

是搏以行石也是故輪雖敝不甌于鑿

搏音團甌音各一音鱗

正義鄭氏康成曰附著也搏圓厚也甌亦敝也以輪之厚石雖齧之不能敝其鑿旁使之動 鄭氏鍔曰澤下濕厥土塗泥輪之踐地處不薄則塗附必多而滯留難行山高峻地多落确輪之踐地處不圓厚則磨磷必速而鑿孔易動矣

案牙不外殺則近地處厚雖爲石所齧僅甌其兩旁而不能甌中央之鑿

存疑鄭氏衆曰不甌於鑿謂不動於鑿中也

辨正賈氏公彥曰先鄭以甌爲動而不動於鑿中後鄭以甌亦敝不能敝於鑿旁不從先鄭者以動者必先動於旁乃及於中不可云先動於中也

凡揉牙外不廉而內不挫旁不腫謂之用火之善

挫作卧反

又祖加反

正義鄭氏康成曰廉絕也挫折也腫癰也 賈氏公

彥曰此經論用火揉牙使之圓正古者車輞屈一木

爲之揉木多外廉絕理內挫折中苟腫負起無此三  
疾是用火之善 毛氏彥清曰內牙之抱輻面者外  
牙之踐地者苟則其兩邊 王氏昭禹曰傳曰恃自  
圜之木則千歲無輪荀卿曰木直中繩揉以爲輪其  
曲中規皆成於矯揉之善也

是故規之以眡其圓也

正義鄭氏康成曰輪中規則圓矣

萬之以眡其匡也

萬姜禹反李音俱注故書萬作禹鄭司農云讀爲禹書或作矩

正義鄭氏康成曰等爲萬萁以運輪上輪中萬萁則

不匡刺也

賈疏見今車近萬萁於輪一邊置於輪上輪一轉一币不高不下中於萬萁則輪不

匡刺也

案此以

試輪牙之平也

案揚雄方言云枸萁車弓也自關而西謂之枸萁又集韻萬萁規車輞則也即此注萬萁文有異同耳後人以矩解之非也

縣之以眡其輻之直也

正義鄭氏康成曰輪輻三十上下相直從旁以繩縣

之中繩則鑿正輻直矣

水之以眡其平沈之均也

正義鄭氏康成曰平漸其輪無輕重則斲材均矣

賈氏公彥曰兩輪俱置水中觀眡四畔入水均否

鄭氏鏐曰上文言平沈必均欲三十輻之均也此則輪已成又置之水欲其兩輪之均

量其數以黍以眡其同也

正義鄭氏康成曰黍滑而齊以量兩壺無贏不足則

同

賈疏謂兩輪俱用黍量之眡其容受同不

存異林氏希逸曰牙轂之數皆以黍量則知其穿孔皆無小大深淺也

案林說非也解已見上捐其數節

權之以眡其輕重之侔也

正義鄭氏康成曰侔等也稱兩輪鈞石同則等矣輪有輕重則引之有難易

故可規可萬可水可縣可量可權也謂之國工

正義鄭氏康成曰國之名工 賈氏公彥曰此總結上文也

通論鄭氏鍔曰經言謂之國工者三輪人爲蓋廬人爲柲與此輪人爲輪皆以其難盡善故能者可貴也輪人爲蓋

正義賈氏公彥曰輪輻三十蓋弓二十有八器類相似故因使輪人造蓋 林氏希逸曰蓋亦圓體故使輪人爲之

達常圍三寸

正義鄭氏衆曰達常蓋斗柄下入杠中者

賈疏蓋柄有兩節達

常是蓋

鄭氏康成曰圍三寸徑一寸也

案圍三寸則徑不足

柄上節

一寸鄭特以大畧言之耳凡言圍徑之數皆然

程圍倍之六寸

程音盈

正義鄭氏衆曰程蓋杠也

鄭氏康成曰圍六寸徑

二寸足以含達常

賈疏程者蓋柄下節麤於達常一倍向上含達常也

信其程圍以爲部廣部廣六寸

信音申廣古曠反

正義鄭氏衆曰部蓋斗也

賈疏蓋斗乃四面鑿孔內蓋方者於上部高隆穹然

謂之部

鄭氏康成曰廣謂徑也

鄭氏鍔曰取在下

程之圍以爲在上部之徑故曰信部徑六寸則圍尺有八寸

部長二尺

正義鄭氏康成曰謂斗柄達常也

賈氏公彥曰此

部即達常以入部中遂名爲部

毛氏彥清曰部厚

一寸而曰二尺者注謂兼達常言之然則達常在部

一寸其不入於部者尺九寸

案不曰達常二尺而曰部長者下記蓋崇十尺曰部長則知達常與程合而爲十尺部之二尺連達常計之矣蓋之柄必分爲二節者時張時弛以便事也古法蓋弓無中斷線貫之節故柄納於部鑿而不可移動非若後世之蓋弓可開可合也故曰良蓋弗冒弗絃殷畝而馳不隊若通一木以爲柄則冒絃張弛及收藏皆不便後世可開可合故又以一木爲便耳

崇蓋

而重非粗柄不能勝然斗之所容者有限故必先以小柄入斗而後以大柄承之此亦一義

程長倍之四尺者二

正義鄭氏康成曰杠長八尺謂達常以下也加達常

二尺則蓋高一丈立乘也

賈疏人長八尺蓋弓有宇曲之減二尺得不蔽人目

也

案程長倍之則達常長四尺矣此以見達常之八程中者又有二尺也達常長二尺程長八尺合而崇十尺皆以其可見者言之而不數其不可見者至程之

入輿底者又當有數寸且有鍵以固之是以雖有疾風莫之搖也

十分寸之一謂之枚

正義鄭氏康成曰爲下起數也枚一分故書十與上二合爲二十字杜子春云當爲四尺者二十分寸之一

案尚書枚卜功臣春秋傳南蒯枚筮之又左驂迫旋

門中以枚數闔

以鳧氏篆聞謂之枚例之枚亦闔上之金乳也闔二扇何用數杜注誤

其訓如个夏官之屬有銜枚氏則以名物此又以起數皆緣文而別其義也

部尊一枚

正義鄭氏康成曰尊高也蓋斗上隆高高一分也

案此一枚在厚一寸之上達常所不入處

弓鑿廣四枚鑿上二枚鑿下二枚

鑿才報反

正義鄭氏康成曰弓蓋橈也

賈疏漢世名蓋弓爲橈子

廣大也是

爲部厚一寸

賈氏公彥曰孔上二枚孔下四枚以

其方下用力故也

案廣當通上下左右言之皆四枚其形正方也至內端則下殺二枚其廣二枚左右殺三枚其廣一枚若但論上下之廣則下文鑿端一枚知其內不知其外矣部圍尺有八寸鑿廣四枚二十八寸占一尺一寸五分寸之一尚有六寸五分寸之四爲餘地不患其柞也下經股圍賈疏亦以方圓四四十六言之鑿深二寸有半下直二枚鑿端一枚

正義鄭氏康成曰鑿深對爲五寸是以不傷達常也

賈疏部廣六寸達常上八部中徑一寸則兩畔下直  
共有五寸鑿深兩畔各二寸半是不傷達常也

二枚者鑿空下正而上低二分也  
賈疏上云鑿下四枚今於內畔鑿下

亦四枚上云鑿上二枚今於內  
畔孔低二分則鑿上亦四枚也其弓蓄則撓之平剡

其下二分而內之  
賈疏部總一寸今鑿上鑿下俱四枚已用八枚其中惟有二枚在撓

減也弓外畔上下四枚今於內畔減  
二枚故云平剡其下二分而內之欲令蓋之尊終

平不蒙撓也  
賈疏蓋弓向外頭仰但以蓋弓三分一分外爲宇曲又以衣蒙之則弓低故使

蓋尊終平不蒙  
撓又得吐水也端內題也  
賈疏其內端又賈氏公

彥曰此言蓋斗內弓之鑿孔內外高下廣狹之度

案鑿空下正而內畔則上低二分所以然者部斗之上僅二枚虞其易裂故留其內畔之二枚以爲固又弓端向外以衣蒙之如經雨則愈重而易垂故使鑿空稍仰以作其勢乃與宇曲之殺相稱也鑿端一枚者部之體圓弓鑿非以漸而殺則不能容

弓長六尺謂之庇軹五尺謂之庇輪四尺謂之庇軫

庇筆

肆反

正義鄭氏康成曰庇覆也故書庇作祕杜子春云祕

當爲庇謂覆輶也

陸氏德明曰輶或作幹音管輶也

某謂輶轂末也

輿廣六尺六寸兩轂并六尺四寸旁減軌內七寸則

兩輶之廣凡丈一尺六寸也

賈疏上云以其轂長二在外一在內以置其輻

輻內九寸半綆三分寸之二金輶之間三分寸之一輻又三寸半總尺四寸以七寸承輿七寸爲軌故云旁減軌內七寸也輿六尺六寸并兩轂六尺四寸總一丈三尺減尺四寸入輿下其餘有丈一尺六寸也

六尺之弓倍之加部廣凡丈二尺六寸有宇曲之減

可覆輶不及輶

賈疏下注云股面三尺幾半通尊二尺爲五尺幾半倍之加部廣六寸總

丈一尺六寸故云可覆軹案輶出轂之外以禦轂之外軹較轂又長故云不及輶

賈氏公

彥曰此言蓋有大小不定之事

案弓有長短庇有廣狹或等威之辨或時事所宜

參分弓長而揉其一

正義鄭氏康成曰參分之持長撓短短者近部而平長者爲宇曲也六尺之弓近部二尺四尺爲宇曲

賈氏公彥曰本鑿弓孔時外畔弓上二枚弓下四枚內畔上下俱四枚由弓頭仰故須近部撓之使平向

下四尺則持之爲宇曲吐水也

參分其股圍去一以爲蚤圍

正義鄭氏康成曰蚤當爲爪以弓鑿之廣爲股圍則

寸六分也

賈疏上云弓鑿廣四枚以方圍之四四十六故知圍寸六分也

爪圍一寸

十五分寸之一

賈氏公彥曰此言弓近部麤近末

細也 王氏昭禹曰弓近部平謂之股猶輻近轂之

爲股宇曲之末謂之蚤猶輻入牙之爲蚤也

參分弓長以其一爲之尊

正義鄭氏康成曰尊高也六尺之弓上近部平者二尺爪末下於部二尺二尺爲句四尺爲弦求其股股十二除之面三尺幾半也

賈疏此鄭解字曲之減減蓋之寬覆軹不及幹之故

以蚤末低二尺爲句持長四尺爲弦而句下空中直平者爲股弦四尺自乘爲十六尺句二尺自乘爲四尺算法以句除弦餘爲股將弦十六尺除句四尺仍有十二尺在以開方法算之面三尺三三去九尺仍有三尺破之以益方不及五寸故云面三尺幾半

上欲尊而宇欲卑上尊而宇卑則吐水疾而雷遠

卑如字一

音婢雷

力又反

正義鄭氏康成曰上近部平者也墮下曰宇

賈疏上謂近部

二尺者宇謂持長四尺者

蓋者主爲雨設也乘車無蓋禮所謂潦

車謂蓋車與

賈疏案巾車五路皆不言蓋以其建旌旂故無蓋其云及葬執蓋從車持旌注

云王生時乘車建旌雨則有蓋又道右職王下則以蓋從注云表尊也既夕禮豪車載簑笠注云今文豪爲潦蓋車於天子當木路司常職旂車載旌注云旂車木路也是木路與潦車爲一物但田獵則建大麾無蓋在國巡行則或載旌或設蓋也

林氏希逸曰勢斗則水去疾而

雷亦遠雷如屋之雷也因上曰宇卑故云雷遠

蓋已崇則難爲門也蓋已卑是蔽目也是故蓋崇十尺

正義鄭氏康成曰十尺其中正也蓋十尺宇二尺而人長八尺卑於此蔽人目 鄭氏鍔曰車出入乎門蓋太高則門不能容人立乘乎車蓋太卑則目無所見

案王乘車而出路門則五門皆車之所出入匠人言路門應門所容之廣而不言其高以此推之蓋崇加車之軹軫轆四尺總十四尺門必更高於此可知

良蓋弗冒弗紘殷畝而馳不隊謂之國工

紘戶耕反殷音隱隊直類

反

正義鄭氏康成曰隊落也善蓋者以橫馳於壘上無

衣若無紃而弓不落也

賈疏弗冒則無衣弗紃則有衣而不須紃也案紃蓋衣

之繫也橫馳於壘上者如南畝則東西馳之東畝則南北馳之軒輕頻而弓易落也

王氏昭

禹曰弗冒者弗以衣覆之弗紃者弗以繩繫之中畝而馳宜隊而不隊蓋弓之入於部者固而不可拔故也非巧出乎衆工焉能及此

輿人爲車輪崇車廣衡長參如一謂之參稱

稱尺證反

正義鄭氏康成曰稱猶等也車輿也衡之長容兩服

賈疏服服馬也以駢馬別有  
鞵鬲引車故衡唯容服也

賈氏公彥曰輿人專

作輿言車者車以輿爲主參如一謂俱六尺六寸也

薛氏曰車制始於輿廣故詩人以權輿爲始

權爲衡之

始輿爲

輿人之法皆以車廣起度隧式較軫軹其

數小大廣狹崇卑皆始於輿廣所以指輿爲車而兼  
數材也

案指輿爲車者輿乃車之正體軸轂輪輶皆爲輿而

設也 輿謂兩轆較式之間六尺有六寸左右任正木之相距則然除轆厚一寸轆內廣六尺四寸

參分車廣去一以爲隧

隧音遂

正義鄭氏衆曰隧謂車輿深也 鄭氏康成曰兵車

之隧四尺四寸

賈疏言兵車者案上文先言兵車後言乘車故據先而言其實乘車亦同

也

賈氏公彥曰隧輿之從也凡人所乘車皆取橫

濶以或參乘或駟乘故橫則六尺六寸從四尺四寸參分其隧一在前二在後以揉其式

正義鄭氏康成曰兵車之式深尺四寸三分寸之二

案或因曲禮兵車不式疑兵車無式非也以軍事不崇敬故不式耳若無式豈復成車乎

賈氏

公彥曰式謂人所馮依而式敬

案式在車前可馮橫於當面在陰板之上而於車深三分之一者式有三面此謂式之兩相也兩相之端與軹之植者相接向前則左右竝折而橫於當面故當面者曰式其兩相深三分之一者亦式也揉者揉其兩曲也後人祇知式之在當面可馮而不知其端

之在兩相者於是繆說紛然矣

以其廣之半爲之式崇

正義鄭氏康成曰兵車之式高三尺三寸

以其隧之半爲之較崇

較吉學反注故書較爲權杜子春云當爲較

正義鄭氏康成曰較兩轡上出式者兵車自較而下

凡五尺五寸

賈疏較謂車輿兩相今人謂之平鬲也兩轡謂車相兩旁豎立者較之兩頭皆

置於轡上二木相附故據兩轡出式言之式已崇三尺三寸更增隧之半二尺二寸故爲五尺五寸林

氏希逸曰轡車旁也音倚

案轡者以其在旁可倚也

案車之深四尺四寸其前三之一式也後三之二則較也較長二尺九寸三分寸之一左右同較橫於車之兩旁下與軹之植者相貫式在前而低較在後而高故鄭云兩轎上出式者也以式低較高望之若兩重然故亦曰重較重較祇以式之在兩旁者言之而不指其當面者當面者不可名較也較在旁亦可馮者人直立則稍向後而一手可以馮較俛躬則稍向前而兩手可以馮式也曲禮孔疏謂式上又橫一木

爲較此繆論之始也若橫於當面則御者射者皆不  
便於運動即俛而馮式首且爲較所觸矣而可乎

式崇三尺三寸自車上計之較崇二尺二寸又自式  
上計之故鄭云自較而下凡五尺五寸 牛車之較  
無高低故名平較賈云今人謂之平鬲者意唐時已  
不見有重較之制故云然抑亦借牛車以明兵車乘  
車也

六分其廣以一爲之軫圍

正義鄭氏康成曰軫輿後橫者也兵車之軾圍尺一寸

案毛氏彥清謂輿人所謂任正即軾其圍尺有四寸  
與此不同此言田車之軾非也無爲舍乘車兵車而  
忽言田車又不明著其爲田車也注軾謂輿後木任  
正謂輿下三面材蓋軾之圍殺於前及左右三面材  
凡三寸耳

參分軾圍去一以爲式圍

正義鄭氏康成曰兵車之式圍七寸三分寸之一  
參分式圍去一以爲較圍

正義鄭氏康成曰兵車之較圍四寸九分寸之八  
參分較圍去一以爲軹圍

正義鄭氏康成曰兵車之軹圍三寸二十七分寸之  
七軹輅之植者衡者也與轂末同名 賈氏公彥曰  
此軹是車較下豎直者及較下衡者直衡者竝縱橫  
相貫也

案騎在兩旁較在騎上軹則植者與衡者午貫而上  
承較植者之上端爲杓牡貫入較中以爲固其數則  
植者三衡者二與古人每取奇偶相錯意此亦然此以一相言之左  
右同

參分軹圍去一以爲轡圍

轡音對注書或作幹

正義鄭氏康成曰兵車之轡圍二寸八十一分寸之  
十四轡式之植者衡者也謂之轡者以其鄉人爲名  
賈氏公彥曰轡形狀與軹同但在式木之下對人

爲名耳

案式橫於當面而兩相揉深入隧三之一

式兩端各長尺四寸

三分寸之二

下以轡承之其數則植者十二衡者三與二

植於兩隅近式之揉曲處四植於兩相六植於當面  
勻布如櫺轡者既取對人爲名兼以偶數爲對也

圓者中規方者中矩立者中縣衡者中水直者如生焉

繼者如附焉

中知仲反  
縣音懸

正義鄭氏康成曰治材居材如此乃善也如生如木

從地生如附如附枝之弘殺也

賈疏材有大小相附著如木之枝柯本大

末小之

弘殺也

案立者橫者謂軹轡也較式亦衡者也直者如生即中縣者言其著於任正木甚固如地中生木深固而不可搖也板之相連與軹轡較式橫直之相交皆爲繼者如附言熨貼泯縫如枝條附幹一片而不可析也

凡居材大與小無并大倚小則摧引之則絕

居如字舊音據并必

反政

正義鄭氏康成曰并偏邪相就也用力之時其大并於小者小者強不堪則摧也其小并於大者小者力不堪則絕也 賈氏公彥曰上言居材得所此言不得所之事凡居材當各自用力若使大材倚并小材小材不堪大材所倚則摧折矣若小并於大大木振其小木力不堪則絕斷也

棧車欲弇飾車欲侈

棧士版反弇於檢反注故書侈作移杜子春云當爲侈

正義鄭氏康成曰棧車欲弇爲其無革鞅不堅易折

壞也士乘棧車

賈疏士乘棧車巾車職文

飾車謂革鞅輿也大夫

以上革鞅輿

孔氏穎達曰弇者上狹下濶

賈氏

公彥曰弇向內也侈向外也車有異物之飾者則得玉金象之名號無名號者直以革爲稱革路墨車之等是也若木路亦以革鞅但不漆飾故以木爲號孤卿轂上有篆飾即以篆縵爲名也

輶人爲輶

輶張留反

正義鄭氏康成曰輶車轅也詩云五檠梁輶

賈疏引秦詩證

輶爲車轅彼注云檠歷錄也梁輶上句衡也一輶五束束有歷錄是也

賈氏公彥曰

三十工無輶人之官但車事難故車官別主此職也

輶有三度軸有三理

正義鄭氏康成曰目下車度深淺之數 鄭氏鍔曰

三度者國馬田馬駑馬之輶深淺不同其度數有三

也 郝氏敬曰輪心直木爲軸亦輶人爲之三理謂

選材之法

國馬之輶深四尺有七寸

正義鄭氏康成曰國馬謂種馬戎馬齊馬道馬高八

尺

賈疏知國馬謂種戎齊道者校人馬有六種下文有田馬駑馬明此四者當國馬也庾人職馬八尺

以上爲龍故云高八尺

兵車乘車軹崇三尺有三寸加軫與轡

七寸又并此輶深則衡高八尺七寸也除馬之高則

餘七寸爲衡頸之間也

賈疏下注衡圍一尺三寸五分寸之一頸圍九寸十五分

寸之九并尺三寸與九寸爲二尺二寸衡圍五分寸之一於十五分寸之九當得十五分寸之三并爲十五分寸之十二圍三徑一二十一寸徑七寸餘一寸十五分寸之十二將一寸亦作十五分通爲二十七

分得徑十五分寸之九此多餘九分當爲馬頸低消  
之案注衡頸之間此頸謂馬頸也若輈頸則不得  
云之間以輈頸在衡之上也衡下有輈輈亦非直厭  
馬頸必有物以承之其間消去七寸而衡與馬頸相  
屬矣疏誤以頸爲輈頸又不計輈與所承之數又以  
輈徑與衡併兩圍而推徑此算法之疎也衡下之  
輈蓋即論語之輈以曲木爲之左傳又謂之輈以其  
句曲故曰輈以其挽馬領故曰輈而輈其異名也古  
注謂輈端上曲鉤衡以駕馬恐非是輈端上曲即  
輈頸與輈相連非別一物未可與大車之輈對

## 田馬之輈深四尺

正義鄭氏康成曰田車輈崇三尺一寸半并此輈深

而七尺一寸半今田馬七尺

賈疏田馬七尺亦約度人馬七尺曰駟以兵車

乘車駕國馬明田車  
駉馬役車駉馬也

衡頸之閒亦七寸

賈疏田車軹崇三尺一寸

半并軹深四尺爲七尺一寸半加軹與轅五寸半  
總七尺七寸馬高七尺則七寸亦衡頸之閒消之軹

與轅五寸半

賈疏知五寸半不七寸者約軹崇與兵車校寸半明軹轅亦校寸半也  
則

衡高七尺七寸

案田以習戎而車則異者兵凶戰危非國馬不可用  
其次力强而高不及八尺者使駕田車以習馳驟則  
可也

駉馬之軹深三尺有三寸

駉音奴

正義鄭氏康成曰輪軹與軫轢大小之減率寸半也

賈疏田車之輪下於兵車乘車軹崇及軫轢皆校一寸半駑馬是六尺之馬所駕之車又宜下故知輪軹軫轢大小之減率例一寸半與田車減兵車乘車同也則駑馬之車軹崇三尺

加軫與轢四寸又并此軹深則衡高六尺七寸也今

駑馬六尺除馬之高則衡頸之間亦七寸

賈疏衡頸之間同七

寸若車雖有高下至於衡頸不得不同故下云小於度謂之無任衡頸用力同是以不得有麤細

軸有三理一者以爲媿也二者以爲久也三者以爲利也

正義鄭氏康成曰嫩無節目也久堅刃也利滑密也  
易氏祓曰下文曰五分其軫間以其一爲之軸圍  
則軸之制附於輶人也宜矣

軌前十尺而策半之

軌軻同音犯注十或作七  
非也鄭司農云書或作軻

正義鄭氏衆曰軌謂式前也 鄭氏康成曰謂輶軌

以前之長也策御者之策也軌是軌法也

趙氏薄曰  
取其在下

持住車有爲  
法則之意

謂輿下三面之材輶式之所封持車正

也 賈氏公彥曰軌字車旁凡與古書車旁已作軻

者字雖異同是式前若軌則車旁九轍之廣爲軌轂末亦爲軌 孔氏穎達曰說文云軌車轍也軌車式前也然則軌非軌也但軌聲九軌聲凡於文易誤寫者亂之 王氏昭禹曰五尺之策御者執之則適可以及馬而無過與不及故取以爲度 趙氏溥曰據下文軌中有灋則輿上置隧處乃是軌軌即輿前任正之橫木

案軌前十尺以輶之自軌至衡相距之直度言之而

弧曲者不計也若依康成揉輈倨句十二之法則軌  
前十尺當得十三尺三寸三分寸之一互見下凡揉  
輈節

凡任木任正者十分其輈之長以其一爲之圍衡任者  
五分其長以其一爲之圍小于度謂之無任

正義鄭氏康成曰此目車持任之材也任正者謂輈  
下三面材持車正者也

案三面材謂前軌與兩旁軌  
車之三面也其後軫輿人作

之故不數賈氏以爲此木上面不見  
止見三面故云三面材恐非正解

輈軌前十尺與

隧四尺四寸凡丈四尺四寸則任正之圍尺四寸五

分寸之二衡任者謂兩軌之間也

賈疏服馬有二馬有一軌軌者尻馬

領不得出兩軌之間謂當軻頸用力之處也

案兩

軌縛於衡中間有空隙處故以兩軌之間言之其實

案兩

衡圍無

麤細也

兵車乘車衡圍一尺三寸五分寸之一

賈疏

六尺六寸故得一尺三寸五分寸之一

無任言其不勝任

賈氏公彥

曰兩轆樹於此木較式依於兩轆故曰任正也

案任正與軌注皆以爲三面材持車正者則任正即

軌也蓋車後橫木并全車之底皆謂之軻其任正則

稍加厚而三面持之以其爲全車之匡郭故謂之軌  
以其內持軫而兩轆較式依之以立又謂之任正上  
云軌前十尺專指式前者從此起度耳亦如全車爲  
軫而又指後橫木以當之也 凡任木統下任正與  
任衡也任者用力持載車以輿爲正故輿下前及左  
右三材爲任正以力持輿之正載處也曰衡任者上  
鉤於輈下屬於馬以引車衡之力也

五分其軫間以其一爲之軸圍

正義鄭氏康成曰軸圍亦一尺三寸五分寸之一與衡任相應 賈氏公彥曰與人職輪崇車廣衡長參如一則俱六尺六寸軫閒即車廣也 十分其軾之長以其一爲之當兔之圍

正義鄭氏康成曰軾當伏兔者也亦圍尺四寸五分寸之二與任正者相應

案方徑當三寸五分寸之三

賈氏公彥

曰當兔謂輿下當橫軸之處 歐陽氏謙之曰兩伏兔居兩旁軾在中央所謂當兔之圍謂軾也

案此下三節言輈之三處麤細不同之度當兔特麤以其全輈所著力又駕時與軸午貫也至踵而細其承載輿底一面必平而外則殺也當兔之前亦應漸殺以承軌而又漸殺以至於頸設兔之處自車前入深三之一下文鄭注伏兔至軌蓋如式深是一尺四寸三分寸之二其後二尺九寸三分寸之一是伏兔之長

參分其兔圍去一以爲頸圍

正義鄭氏康成曰頸前持衡者圍九寸十五分寸之

九

賈疏衡在輶頸之下其頸於前向下持制衡鬲之輔故云頸前持衡者也

五分其頸圍去一以爲踵圍

正義鄭氏康成曰踵後承軫者也圍七寸七十五分寸之五十一 賈氏公彥曰後承軫之處似人之足跗在後故名爲踵 趙氏溥曰前爲頸後爲踵頸以持衡踵以承軾軸之上當兔當兔之圍大於持衡持衡之圍大於承軾

凡揉輈欲其孫而無弧深

孫音遜  
弧音胡

正義鄭氏康成曰孫順理也弧木弓也凡弓引之中

參中參深之極也揉輈之倨句如二可也如三則深

傷其力

賈疏弓之下制六尺引之三足是中參深之極也若六尺引二尺則是每尺得三寸三分

寸之一輈長丈四尺四寸引三分之一爲四尺八寸  
國馬之輈深四尺七寸言如二舉大數而言

案輈

出前軌漸曲而上至衡微鉤而下軌前十尺揉之已  
定者也倨句如二引其三之一蓋以一丈三尺三寸  
三分寸之一揉之爲十尺也疏并輿下之不揉  
者及軌前揉之已定者通計十二亦算法之疎

賈

氏公彥曰揉者以火揉使曲也欲順理揉之無得如

弓之深弓之深太曲也

案輶雖揉之而曲亦必以木之本曲而可爲輶者揉之若直木而全恃火力以相勝則馬之所引未有不久而返其直性者矣

今夫大車之輶摯其登又難既克其登其覆車也必易此無故唯輶直且無撓也

摯竹二反覆芳服反易以豉反

正義鄭氏康成曰大車牛車也摯輶也

案既夕禮志矢一乘輶輶

中注軒輶猶軒輶中適中也前重則輶後重則輶

登上阪也克能也

案又難猶言甚

難既克其登言竭  
牛力而僅能登也

賈氏公彥曰輶人主爲四馬車

輶因說牛車之輶直而不撓之意

案牛之高者視駑馬又肩高而頸低大抵五尺有餘  
下者則五尺不足大車輪半徑四尺五寸加輶徑與  
軸半徑約六七寸合五尺一二寸柏車輪半徑三尺  
加轂半徑一尺轂入輿下則伏兔必高伏兔與輶徑  
約尺四五寸合四尺四五寸以牛之高下差三等之  
車則輶用直可見矣大車輶無曲法登下之間易犯

諸病全恃牽傍者爲之調劑補救馬車進退便捷而不患此者以轅曲而揉之善故也 大車之轅摯惟直故摯也既曰轅直又曰且無撓者直言其無穹而上者無撓言其無曲而下以持衡者

是故大車平地既節軒摯之任及其登阨不伏其轅必縊其牛此無故唯轅直且無撓也

縊一計反注故書伏作偪杜子春云偪當

作伏

正義鄭氏康成曰阨阪也

案上言大車不利於登此言大車雖行平地時多而亦有不能不登阨之時牽傍者必抑制而伏其轅如不伏其轅則車後仰而牛之吭膺間束絆者必若絞縊矣曰節軒摯之任者必所載前後適相稱然後無軒輊之患也

故登阨者倍任者也猶能以登及其下阨也不援其阨必緦其牛後此無故唯轅直且無橈也

卽丁禮反緦音秋注故書緦作

鯁鄭司農云鯁讀爲緦關東謂紂爲緦

正義鄭氏康成曰倍任用力倍也 郝氏敬曰下阨車邸前頽不使人扳援則壓制牛尾如緼也

案此言下阨尤難必手援輿底之向前者以輕其任然後無崩奔之患若不援其邸則任重勢猛其下若崩而緼其牛後矣以上三節借牛車之轅以明兵車乘車之輅不可不曲之意非謂牛車之轅亦當曲也

是故輅欲頽典

頽苦狠反典音殄注鄭司農云頽讀爲懇典讀爲殄

正義賈氏公彥曰此已下還說四馬車之轅 鄭氏

康成曰頤典堅忍貌

存疑鄭氏衆曰駟馬之轅率尺所一縛頤典似謂此也

輶深則折淺則負

正義鄭氏康成曰揉之大深傷其力馬倚之則折也

揉之淺則馬若負之

賈疏輶直似在馬背負之相似

輶注則利準利準則久和則安

先鄭依故書準作水後鄭讀注則利句準則久

句衍準  
利二字

正義王氏昭禹曰注而利準此輶之和也和則人乘之而安 易氏祓曰不深不淺若水之注無所凝滯故行則利而順載則準而平利準則愈久而愈堅馬引之而和人乘之而安此輶之善也

存疑鄭氏康成曰注則利謂輶之揉者形如注星則利也準則久謂輶之在輿下者平如準則能久也和則安注與準者和人乘之則安 鄭氏鍔曰惟其勢如注則車必利而無凝滯其平如準則車必平而無

傾側利而速準而平則其弊壞也亦難此車所以能  
久

案注水之管中穹而兩端微下輶之不淺不深似之  
則馬之引之也利而車行如準之平久者言輶之難  
弊也安者言車之無傾也

輶欲弧而無折經而無絕

正義鄭氏康成曰揉輶大深則折也經亦謂順理也  
鄭氏鍔曰孫即經也順其文理謂之孫順理而直

謂之經不順理則斷絕而不相屬矣

案上言凡揉輒欲其孫而無弧深此申明之言其形亦近於弧但不可太深而折欲其孫必循木之經而毋絕其理也

進則與馬謀退則與人謀

正義鄭氏康成曰言進退之易與人馬之意相應馬

行主於進人則有當退時

案交衢水曲車多轂擊馭者自有退之留之以爲避

就恰適之法疏謂路遠則倦當有退時非也

郝氏敬曰凡車之任重致

遠者皆馬之力也故進則欲其與馬謀凡車之遲速  
進退惟人之馭也故退則欲其與人謀然非輶之和  
則不能也

終日馳騁左不捷

捷杜音蹇  
鄭作倦

正義鄭氏康成曰杜子春云捷或作券某謂券今倦  
字也輶和則久馳騁載在左者不罷倦尊者賈疏在左

尋常在國乘車之法尊在左御者中央曲禮乘君之  
乘車不敢曠左左必式注云君存惡空其位是尊者  
在左也

行數千里馬不契需

契苦結反需音須又乃亂反

正義鄭氏衆曰契讀爲爰契我龜之契需讀爲畏需之需謂不傷蹄不需道里

終歲御衣衽不敝

正義鄭氏康成曰衽謂裳也 王氏昭禹曰車行而無搖動之勞則御者衣衽亦無傷敝之害也

此唯軻之和也

正義鄭氏康成曰和則安是以然也謂進則與馬謀

而下

案已上四節言車左安馬安御者安皆由輶和而馬行穩稱停勻疾徐中節也不言車右者右時下推車無取乎安且或貳乘則無右也

勸登馬力馬力既竭輶猶能一取焉

正義鄭氏康成曰登上也輶和勸馬用力馬止輶尚能一前取道喻易進

案輶則持衡衡則縛輶輶在馬頸總在七寸之間馬

止則輈止而記云爾者極言輈和輪利雖馬止而尚有鄉前之勢耳

良輈環潢自伏兔不至軌七寸軌中有潢謂之國輈

潢子

肖反李在學反

正義鄭氏衆曰環潢謂漆沂郢如環

賈疏潢謂漆也沂郢如環謂漆

之文理也

鄭氏康成曰伏兔至軌蓋如式深

案如式深是一尺四

寸三分寸之二兔長二尺九寸三分寸之一軸當車前後之中軸前有兔七寸三分寸之一軸後二尺二寸也  
兵車乘車式深尺四寸三分寸之二潢下至軌七

寸則是半有濇也

賈疏自伏兔至軌一尺四寸三分寸之二半有濇則七寸三分寸之

一言七寸不言三分寸之一舉全數而言也

輈有筋膠之被用力均者則

濇遠

案弓人記角環濇牛筋蕢濇麋筋斤蠆濇蓋漆以所著而異其丈角質堅而理密既治滑易故漆文如環輈之漆文如環則木堅密而治之滑易如角矣故以驗其良

通論毛氏應龍曰韞人爲臯陶曰良鼓瑕如積環弓

人爲弓曰角環濶皆謂漆之文理自然如環

存疑鄭氏鐸曰轉不和而動搖則軌中之漆消磨而  
不見矣

軫之方也以象地也蓋之圓也以象天也輪輻三十以  
象日月也蓋弓二十有八以象星也

正義鄭氏康成曰輪象日月者以其運行也日月三  
十日而合宿 易氏祓曰輿與軫皆方而軾最下故  
不言輿而言軾以所象者地也輪與蓋皆圓而蓋居

上故不言輪而言蓋以所象者天也

案車動則輪轉故以象日月之運行蓋建無遷移故以象經星之布列

龍旂九旂以象大火也

旂音留

正義鄭氏康成曰交龍爲旂諸侯之所建也

賈疏司常職文

大火蒼龍宿之心其屬有尾尾九星 賈氏公彥曰

車上皆建旌旗故因說旌旗旂之義此九旂七旂六旂四旂之旌旗皆天子自建非謂臣下知者以九七六

四不與臣下命數相當故也若臣下則皆依命數然  
天子以十二爲節今建九旂七旂六旂四旂者上得  
兼下也注引司常者蓋取彼交龍以釋此旂因言諸  
侯亦建旂非謂此記論諸侯事下州里師都縣鄙竝  
同

案旂之正幅爲繆旂則別以帛爲之如其數綴於繆  
如冕之有旒趙氏溥謂裂旂之邊幅爲數條臆說也  
惟別爲一物而相連屬故尾九星取大火之屬星七

星取鶉火之屬參與伐連而爲六營室與東壁連而爲四羣儒爭以不取本星而取連屬之星破鄭注皆由未達此義耳 以上文蓋弓輪輻已著日月星辰故不及三辰之常記者因事以立文義當然也且日月爲常載在春官人所共曉可不必詳  
鳥旗七旂以象鶉火也

正義鄭氏康成曰鳥隼爲旗州里之所建

賈疏司  
常職文鶉

火朱鳥宿之柳其屬有星星七星

熊旗六旂以象伐也

正義鄭氏康成曰熊虎爲旗師都之所建

賈疏司常職文伐

屬白虎宿與參連體而六星

龜蛇四旂以象營室也

正義鄭氏康成曰龜蛇爲旐縣鄙之所建

賈疏司常職文營

室玄武宿與東壁連體而四星

毛氏應龍曰九旗

特舉其四者全羽爲旛析羽爲旌未嘗有旂也通帛爲旌雜帛爲物未嘗畫也不舉大常義未詳

案聶氏崇義三禮圖九旂者九龍七旂者七鳥非也  
惟一升一降故曰交龍若各准其旂數則大常十有  
二旂日月星辰可各畫十二乎趙氏溥謂龍橫畫取  
可升可降然注一象升朝一象下復於義爲近難以  
臆說破也

弧旌枉矢以象弧也

正義鄭氏康成曰覲禮侯氏載龍旂弧韞則旌旂之  
屬皆有弧也弧以張縵之幅有衣謂之韞又爲設矢

象弧星有矢也妖星有枉矢者蛇行有尾因此云枉矢蓋畫之 賈氏公彥曰弧旌者弧弓也旌旗有弓所以張繆幅故曰弧旌也枉矢者就旌旗張繆弓上亦畫枉矢

案注據覲禮謂旌旂之屬皆有弧但此記弧旌宜爲軍事所特建蓋畫弧與枉矢於旌以象天討也上四旗乃平時所建故特表弧旌與司常九旗不列大白而別見巾車義同以軍用凶禮故耳如鄭注則祭祀

賓客所建大常龍旂皆畫枉矢何義乎

存疑易氏被曰曲禮前朱雀而後玄武左青龍而右  
白虎正與此記合彼記曰前有車騎古者有車徒而  
無騎騎始於戰國所記豈戰國之旗物與



欽定周官義疏卷四十



覆校官庶吉士臣茅元銘

校對官編修臣鄭燧

謄錄貢生臣周廷琰